

天花精言目錄

卷五

藥性總論

破氣藥論

調氣理氣藥論

氣分升發表散藥論

氣分溫補平補藥論

破血藥論

涼血活血藥論

血分升發表散藥論

血分溫補平補藥論

清火利水藥論

解毒消腫藥論

目病藥論

天花精言卷五

藥性總論

毒猶寇也。藥猶兵也。醫猶將也。用藥以驅毒。卽用兵以逐寇。是在爲將者運用何如耳。不知兵之性。是以兵與寇也。不辨藥之性。是以孩之性命與毒也。然則藥可不辨乎哉。以大綱言之。或在氣分。或在血分。判然不同也。以各經言之。或在某臟。或在某腑。又或在某經之氣分。或在某經之血分。釐然迥別也。且有一藥專走一經。而不相假借者。更有一藥兼治各經。而

可以變通者。善爲運用。而君臣佐使。迭爲賓主。不必株守夫常格。加之炮製。而分門別戶。任我驅策。何俟拘滯乎成見。可升可降。可補可瀉。可溫可寒。可斂可散。可以發揚而達於表。可以搜剔而抉其根。可以半表半裏。而各極其妙。大黃可以止瀉。人參可以攻毒。清火而偏用溫散之劑。涼血而反忌沈寒之品。又或補中帶清。一切滯補之藥。須爲揀選。養而帶活。一切溫補之性。必用釐剔。藥味有限。運用不窮。是必考辨詳明。炮製精細。用一藥必獲一藥之效。而變通之以

盡其致。立一方。必合羣藥之力。而參互之以奏厥功。棄取不必隨人。輕重總歸自忖。苟非藥性嫺熟而深究其微。又烏能變化隨心哉。且夫藥性之說。散見於醫書者。亦不知凡幾。何煩予之過爲。曉曉乎。蓋治病者。可以從容而圖。獨痘證門中。則限以時日。而吉凶之分。判於俄頃。故用藥之法。亦與尋常不同。有一日而數劑者。蓋一步跟不上。則雖悔何及。一著用得錯。則補過無時。以孩之生死。只決於數日之內。以數日之輾轉。責望乎治者之手。而兢兢焉求孩之命於此。

數味藥中而顧可不細心講求乎。雖曰藥性浩繁。難以備舉。而與痘不相宜者。不敢濫收。故採擇乎當用者。各分其門類。詳著其用法。而一一剖晰焉。苟隨證而酌度之。亦庶乎不窮於用矣。

破氣藥論

氣領毒而出者也。毒盛則氣爲所制。閉塞而不能暢達。何以領毒乎。破氣者。破其閉結。使得以暢達也。獨不慮損真氣乎。蓋氣爲毒制。不破其結。則真氣爲消耗。所謂陽亢則絕者是也。迅利之藥。其性雖雄。有受

之者矣。開其結聚之熱。而真氣鼓盪。自能透發。痘有不起者乎。故精選破氣之藥。列之於左。以備採擇焉。

大黃

大黃者。其性苦寒。而最能滲熱。其體通利。而直注大腸。所以逐梟毒。破瘀血者也。名之曰將軍。以痘之毒。非此不足以勝之耳。生用則直下。酒炒則竝利胃膈。九蒸則上行頭目。陳醋煮之。則能破肝經之積。紅花煮之。則能開血分之瘀。所謂以行氣之藥。而兼能奏功於血分者。此也。宜

輕宜重。當審慎用之。而不可鹵莽焉。

青皮

青皮者。肝經行氣之藥。而兼開脾經者也。痘顆不起。重用青皮。何也。蓋肝氣鬱結。必橫隔於中。而脾氣亦不暢發。痘何以起乎。故重用之以開肝氣。肝氣開而中氣亦暢。則囊殼自然充肥。此青皮所以爲起脹之妙品也。然亦能大損中氣。不可不知。

山查

山查能消肉食。而治痘者以爲寬氣道而鬆痘毒。何也。脾家有積。則其氣不能健爽。而毒氣更因之而壅遏。此痘之所以不能鬆活而圓暢也。山查消其積聚。則中氣快利。得以暢發於周身。而痘形自然聳動。故曰寬氣道而鬆痘毒。且兼能破血中之滯氣。

枳殼

枳殼能降肺氣。肺與大腸相表裏者也。上而肺管中而胃膈下而大腸。皆肺主之本。一氣相通。

者。枳殼能從肺管吹之使開。而直通大腸。利氣之妙品也。去脹消痞。化痰止嘔。皆氣降故也。

枳實

大者爲枳殼。小者爲枳實。與枳殼同性。而其力雄猛。故昔人以爲有推牆倒壁之功。佐大黃而下行。取其直通大腸之氣。而莫能阻礙也。製法與枳殼皆用麩炒。其專行肺與大腸之氣。則一也。氣虛宜審慎用之。

厚朴

厚朴溫中下氣、寬膈而消脹、能洩胃實。陽明氣分之藥也。治痘者以其溫中、每畏其燥而不敢用。不知胃膈滿悶、腹脹難消、非此不除。雖曰性溫而兼能散之妙。昔人用之以平胃而炒之以薑者、更引之而入胃也。嫌其溫而竝棄其寬膈下氣之功、誤矣。

桑白皮

桑皮利膈止嗽、定喘化痰、而其妙總歸於能瀉肺氣。氣降故諸證皆平也。尤長於利水。蓋肺爲

金。金能生水者也。利水卽瀉其子以洩其母之意也。故於降肺氣爲最宜。

前胡

前胡。肺家藥也。散風熱。利胃膈。止嘔定喘。以其能降胃前之氣也。故胃膈煩悶者。以前胡佐大黃下之。

檳榔

檳榔能逐癘疫之氣。消水除痰。化食破積。寬膈之妙品也。兼能降至高之氣。墜諸藥而下行。蓋

痘中目證。非檳榔不能散其蒙閉。故又爲去障磨翳之聖藥。以其能開氣結也。雄者爲佳。磨汁用之。見火則無功。

烏藥

烏藥能理七情之鬱結。解氣血之凝滯。最宜於腳氣疝氣。以其兼能利小腸之氣而下行也。其性辛溫。故痘家每忌用之。豈知其專主洩氣溫而能散乎。佐生牛膝而利下部之氣。必不可少。

赤芍

赤芍者散結利水療毒壅之腹痛化小腸之結聚者也。故熱結膀胱小便不通者非赤芍不爲功。以其能破小腸之滯氣而爲痘證門中至要之品也。

鬱金

鬱金其味辛苦直入心之包絡。故醫家用之以豁心中之痰。以其能開心經之鬱也。痘中心火太盛舌爛生瘡導赤而君火不能下降者佐之以鬱金則鬱開而火自散其功倍捷於菖蒲耳。

調氣理氣藥論

毒結氣分者。必破其結矣。若氣分閒有未暢。不至爲毒所錮。又或虛中有滯。槩施以破氣之藥。是損其真氣也。無乃太過乎。調之而氣分自開。理之而氣分更健。是不可不酌量於其閒也。故精選調氣理氣之藥。而列於左。

香附

香附。能開六鬱。血分之藥。而古人平胃散兼用香附。何也。以其能解中宮鬱結之氣。而使之鬆

暢也。故痘證有中氣不暢而不敢破者。以香附調之。

白芍

白芍者。能斂能散。肝經之藥。而實主調和血中之氣者也。治痘者。惡其能斂而禁之。又烏知爲調和肝氣之妙品哉。且酒炒則能調。生用竝能破。

麥芽

麥芽。能消麪食。脾胃藥也。能啟脾而進食。寬中